



Sorkari H9N2 wara atema renema dang lir: Health Ministry

Anünglaki satellite yokba ya pei temeden amshiba: Kim Jong Un

VOL. XXI NO. 48 (ADOK 48) DIMAPUR

KÜPTOKNU (SATURDAY)

YIMPOKSÜ (NOVEMBER) 25, 2023

₹ 5.00

## Nagaland-i Hornbill Festival 2023 atema renemer: Taküm benjung khenyongi balaka asütsü

**Kohima, November 24, 2023**  
**(TYO):** Nagaland nung anogo 10 nü Hornbill Festival nung alima tesem balala nungi tourists arutsü aliba atema renemer ta Higher Education & Tourism Minister Temjen Imna Along-i ashi.

Hornbill festival dang 'festival of festivals' ta ajar aser state sorkari kümshia tourism ajungkettsü atema ayongzüka amonger. December 1 nungi 10 tashi Naga Heritage Village, Kisama nung iba benjung amonger.

"Linük nung benjung tongtipang ka state tilaka nung amongtsü atema anogo tatonger" ta Hokolbarnü Minister Along-i Imagi.LAND nung osangbener den jembidang ashi.

Chief Minister Rio-i tanü line departments, sendaktepa alirtem den tatembang senden ka menogo aser paisa Kisama Heritage village



November 24, 2023 nü Chief Minister Neiphiu Rio-i Imagi.LAND nung anogo ananü Food and Music Festival tenzüksüdang agiba noksa angur.

nung maparen inyakba repringdangogo ta Minister Along-isai ashi. Chief Minister Neiphiu-isai Imagi.LAND nung anogo ananü Food and Music Festival tenzüksü.

Maparen kanga junga inyaka arudar aser anogo ana-asem ka tsüngda tembangtsü. Taküm benjungmong ya balaka asütsü aser sangküm küm 25 anungba

jeli sentong ka ama agitsü, ta Along-i metedaktsü.

"Eastern Nagaland Peoples' Organisation (ENPO)-i district 6 atema state balaka meshia küm ka mokdangba sülen ano tanaben Hornbill Festival nung shilem agitsü lemtetba pelashishia agizüker" ta paisa ashi.

"ENPO-i Naga nunger longjema lir ta sayutsü atema tejakleni aruba atema kanga pelar" ta Minister Along-isai shisem.

"Tesüiba küm ana tashi Hornbill festival asoshi tetsüdkar arajua liasü saka taküm ya Naga nunger ajak longjema benjung ka asütsü. Nagaland aser tangalen alirtemi tesem ka nung kin balala sobaliba aser inyaksangshi repringtsü atema arutsü mepishir" ta paisa ashi.

Taküm Hornbill Festival nung official partner countries ji United States of America, Colombia aser Germany lir ta yashi Chief Minister Neiphiu Rio-i-a metedaktsüo.

Linük asem den yariteba

ajanga tesentaktep akangshitsü aser ajangzüksü imlar, ta pai ashi.

Iba dak sendakba atema asüngdangdang "partner countries den tatem kuma ano mejembi lir saka parnok arua amongdang jembishinütsü" ta Minister Along-i langzü.

24 buba hornbill festival atema booklet ka adoktsü aser bendanger ketdangsür aika shilem agitsü ta paisa ashi.

"Taküm benjung nung tangar atsür arubaji state animal - Mithun indang exhibition asütsü, iba ya Minister Along-i shisatoba lir" ta Tourism Additional Director Viyelo Duolo-i ashi.

Hornbill festival nung tanga line departments medeni tourism department-i Rs 5 crore shi endoker. Yaküm local entrepreneurs den hotels aser home-stays dena Rs 109 crore ajangzükteta liasü" ta paisa ashi.

"Yaküm Kisama kija nung local aser non-local tourists 1,40,000 tema aru" ta Minister Along-isai metedaktsü.

Chief Minister Neiphiu Rio-i

Hornbill Festival 2023 atema Bamboo Heritage Hall, Kisama nung line departments/ sectoral departments den senden ka menogo.

Iba mapang CM Rio-i Hornbill Festival 2023 atema mapa junga inyakba atema pelaba metedaktsü.

Tanga linüktem nungi dena ketdangsür aika benjung amongi arutsü anungji benjung takok ngua amongtsü atema nendaka inyaktsü ayongzüker, ta paisa ashi.

Paisa merükmejuba nung temulung agütsü aser tourists yaria parnok nüngdakbatem peritsütsü atema metedaktsü.

Hornbill Festival 2023 nung shihilembartemia jenjang dalang agi yokyayokjitsü mepishir, ta CM Rio-isai ashi.

ENPO-i Hornbill Festival nung shilem agitsü lemtetba atema kanga pelar. Hornbill Festival terenlok lia arur aser sangküm küm 25 amongdang takok tuluba ngua amongtsü imlar, ta paisa metedaktsü.

Senden nung Chief Secretary, J Alam, IAS-i bangdak department temi inyaka aruba osang lemsatep.

"Kin ajaki shilem agiba ajanga benjung tulu amongtsü. Nisung ajaki state tenüng asoshi tenüng menük bentsür marutsüsa yariteptsü ayongzüker aser bangdak department temi pei akokba tashi meranga inyakdar" ta Alam-i ashi.

Tourism, Art & Culture, Agri & Allied Departments-ia pei pei inyakba osang lemsatep.

## Naga lennirtem den külemi MNF-i Centre den jembitsü: Mizoram CM

**Aizawl, November 24, 2023**  
**(Agencies):** Manipur nungi MLA tem den olemtep alitsü asoshi pa den jembitepdar ta Mizoram chief minister aser Mizo National Front (MNF) president Zoramthanga-i ashi.

"Naga lennirtemi MNF-i tuyuba sülen anidaker aser iba ya India sorkar dang Manipur tensa chichiba sayutsü atema lir. Iba onük asoshi Centre den yimtenren tangatetba

shitak metedaktsütsü nüngdaker" ta Zoramthanga-i ashi.

Myanmar, Bangladesh aser Manipur nungi Zo nunger atema Mizoram ya Jerusalem ama lir ta paisa ashi.

"Deobarnü Aizawl nung alir ajak tenla kidang adenshir aser iba ama alima nung tesem mali. MNF ya Tsüngremi moatsür aser iba lagi küm 60 tema inyaksangshia arur" ta Zoramthanga-isai ashi.

2024 nungi Assam nung UCC tenzüksü: CM Sarma

**Guwahati, November 24, 2023**  
**(Agencies):** February 2024 nungi Assam nung Uniform Civil Code (UCC) tenzüksü ta chief minister Himanta Biswa Sarma-i ashi.

"Uniform Civil Code (UCC) tenzükba sülen Assam nung tebur kati kinungtsü aika meyutetsü. Nisung kati ano tanaben kibong kümünnüra, pai mezüngbuba kinungtsü den balatsüla" ta CM Sarma-i ashi.

Telangana kübok Charminar nung election campaign rally ka nung jembidang pai iba osang metedaktsü.

Telangana assembly elections nung BJP manifesto nung Uniform Civil Code (UCC) benoktsü nangzüka lir.

Telangana nung BJP-i sorkar akumba sülen UCC mapa tenzüksü ta taoba mapang Union Home Minister Amit Shah-ia shia lisü.

Ajisüaka taküm küm tetenzüklen Union minister SP Singh Baghel-ibo UCC ajanga Northeast nung timtem tem lir.

BJP-i Northeast nung lisopurtem aser kin balala sobaliba akhümtsübur ta Baghel-isa ashi.

"BJP-i aniba sorkari Northeast nung alirtem taginüba anema ozüng kecha meyংglutsü. Northeast sobalibatem party-i akhümtsübur aser tamangba yimsü mesüra lokti sobaliba meyirütsütsü" ta paisa ashi.

"Assam, Meghalaya, Tripura aser Mizoram dena Northeast kübok tesem kar nung Centre-i yangluba ozüngtem benshitsü makok kechiyong parnok Constitution of India nung Schedule 6 ajanga kümzüka lir" ta union minister SP Singh Baghel-isa ashi.

Tang Northeast state dang astingdangyaba sülen ang ozüng ka yanglutsü mesüra mapa kümä inyaktsü ta ta paisa ashi.

Linük nung UCC anema noktakba state tongtitemji Meghalaya, Mizoram aser Nagaland lir aser state asem ya Khristantemteimba ser aliba state tem lir.

**Dimapur, November 24, 2023**  
**(Agencies):** NSCN (I-M)-i yimten latettsü anemba telok ka kümogo aser tamagtsü o jembir ta Working Committee (WC), Naga National Political Groups (NNPGs)-i metedaktsüo.

NSCN(I-M)-i küm 22 tashi olemtapa mebenokba onük-wako aser temzung enoksema alizüng melensi ta WC-i ashi.

India sorkari NSCN-IM dena Naga teloktem den October 31, 2019 nü olemtep tembangogo ta ashir. NSCN-IM-i India sorkar den lemsateptsü tashi balaka mali anungji sovereign powers lemsatepbaji Indian constitution agizükba lir. Külen Agreed Position ajanga WC-NNPGs-i Indo-Naga mangatettep temaba jenjangi ajungket aser India sorkari Naga nungeri pei sasa lemtettsü temeten agizük, ta parnokisa ashi.

"Onoki November 17, 2017 nü Agreed Position (AP) sign süteba ajanga NSCN (I-M)-i aibelena inyakba metongshiogo" ta parnokisa metedaktsü.

"NSCN-IM lennirtem nem maneni inyakdakjang saka tanüngba Naga nungeri tanü

kechi agizükttetsü ibaji agizüktsüla. Pei ajangzüksü bilema inyakba nisung kar sülen anidakbaji shisa maka" ta WC, NNPGs-isa metedaktsü.

"Indo-Naga mangatettep adoker küm 80 tema arur. Naga yimtenren, putiotsü aser maitsü temeten meyipa bener arutsü atema asenoki inyaker. Wako mesüra temzung atema dang yimtenren olemtep tenzükba masü. Asenoki agiba political agreement ajanga India sorkari Naga wako aser tanga maitsütem koma akhümtsübsü lemtettsü" ta parnokisa ashi.

"Onoki November 17, 2017 nü Agreed Position (AP) sign süteba ajanga NSCN (I-M)-i aibelena inyakba metongshiogo" ta parnokisa metedaktsü.

"NSCN-IM-i küm 20 tema meinyaktetba onoki küm ana tsüngda Naga civil societies, NTC, NGDF, tribal hohos, shisashirtem, kaketsir teloktem, ex-Parliamentarians aser ozüng

meteter tem den asüngdangtapa Agreed Position renem" ta WC-isa ashi.

"MIP, NSCN(I-M)-i media nung Naga shisashirtem aser social activists anema jembiba aitsü. Naga yimtenren maparen asoshi shisatsü lemsatepertem tebang nembangtsütsü merangertem ya linük anema noktakertem lir" ta parnokisa ashi.

Naga nunger balaka ketdangsüa alitsüba anema noktakertem ta tai tonglokja NSCN(I-M)-i Naga nunger tongtipang lennir aika tepsetogo ta WC-isa metedaktsü.

Tasürtem rongnung asür Hollohon'er kibong, asür Gen.Povezo Soho, asür Chalie Kevichusa, NSCN general secretary Dally Mungro dena lir. Ano Dr SC Jamir aser Sümi Hoho president Huskha Yephomi taküm agitsü merangogo aser Alemtemshi Jamir nunger nem "quit notice" agütsügo ta WC, NNPGs-isa metedaktsü.

## Mkg. nung coffee lu ayimertem nem coffee tajungtiba nung ayimtsü tesayuba agütsü



*Mokokchung nung coffee lu ayimertem nem coffee tajungtiba nung ayimtsü tesayuba agütsü sentong nung shisalen sayur aser tadenertem külemi tangokba noksa.*

**Mokokchung, November/ Yimpoksüi 24 (TYO):** Tanu Mokokchung nung Coffee lu ayimertem Pradhan Mantri Krish Sinchayee Yojana-WDC 2.0 sentong nung aliba ama Land Resources Office, Mokokchung Conference Hall nung Department of Land Resources, Mokokchung-i ayongzüka coffee lu koba yimya nung ayimtsü iba indang tesayuba sentong ka kaogo.

Department of Land Resources, Mokokchung tenüng nung Asstt. Inspector Land Resources Wb.L.Temsü-i pelashishia agizüka jembiba den paisa sentong nung adenertem dang iba sentong ya Mokokchung nung coffee lu ayimertemi coffee tajungtiba nung anepalua yimer tajangzük agitedakstsü nüngtem nung ayongzüka akaba lirta lemsatepa ayongzük.

Tanu iba sentong nung adentsü arurtem dang shisalen asen Naga lima nungbo coffee-ji May aser June ita nung

sayur Coffee Board Mokokchung, Extension Inspector O/o Senior Liaison Officer Wb.N.Imtisungchit Imchen-i alima nung Nagaland nung adokba coffee-ji tajungtiba, Naga nungeri akhümbok nung coffee meidaktsübaji kanga dang junger, takum küm alima ajunga indang coffee tajungtiba shimba nung Aurora International Taste Challenge (AITC) 2023 South Africa nung akadang Nagaland coffee Gold Medal senpet agizük, anungji coffee lu ayimertemi meranga inyaka züsenteta tajangzük agiangta lemsatep.

Shisalen sayur-isa Coffee metsüh koma ali nung rema yur meitedadka süngdong küma anepalua koma intedadkstsü aser koba yimya nung tsünütsü iba indang tejangja terasa vedio ajanga sayua lemsatepba den

asen Naga lima nungbo coffee-ji May aser June ita nung

tsünütsüla aser akhümbok shilem 50 aser anü shilem 50 pulokdakja atembasa tajungtiba lirta metedadkstsü.

Coffee koma anepalua ayimtsü, tasazük kwi nung atemtsü, süngdong talang kümer koma anepalutsü, coffee tejang ongzüker kelen teküp satoker koma anepaluba ajanga jenjang tajung nung yokettsü iba indang terasa tejangja shisalen sayur Imtisungchi-isa metedadkja liasü.

Coffee Board Mokokchung, Extension Inspector O/o Senior Liaison Officer

Wb.N.Imtisungchit Imchen-isa coffee tejang ongzüker kelen kol

nung koma menüngtsü aser koma anepaluba kongdakstsü, iba indang kol nung tejangtem inoker menüngä sayua liasü.

Tanu iba sentong nung Mokokchung district kübok yimtsüng balala nungi coffee lu ayimer aika dena tangazükba agia liasü.

Miss Nagaland 2023 asoshinisung 14 tokteptsü

**Kohima, Yimpoksüi/Nov. 24 (TYO):** Wokha aser anüdoklen aliba district tem dak alaka Nagaland nung district toku nungi nisung 14-i Miss Nagaland 2023 asoshi tokteptsü.

Iba sentong ya Hornbill Festival nung shilem ka ama December 8 nikongdang 5:00 ako nung tenzüka Capital Cultural Hall, Kohima nung alitsü.

Hokulbarnü Hotel Ura, Kohima nung osangbener senden ka nung jembidang tesüiba küm 31 tashi iba pageant ayongzüka aruba Beauty & Aesthetic Society of Nagaland (BASN) tir Mele Puchö-i ashiba agi, tetokteper 14 nungya shilem agiba district tem nungi crown holders aser district kar nungi 1st runners-up aser organizer temi tawa open audition agiba nung shimba kar alitsü.

Miss Nagaland jenjang anguri senpet sen lakh ka, runners-up jenjang anguri senpet sen 70,000 aser second runners-up jenjang anguri senpet sen 50,000 denano sen 50,000 nungi lakh ka tashi jenjang sempetlep angutsü, ta pai ashi.

Danga subtitles tem indanga yakta sangdongtsü ta pai ashi.

Beauty queens nem sapang tajungba agütsü mechi tematiba jenjang ana nguteter Miss North East Pageant 2024 nung direct entry alitsü, koba Arunachal Pradesh nung alitsü lir.

Miss Nagaland ya national

level sentong aser ano international contests nunga shilem agitettsü, ta pai ashi.

State nung Miss Nagaland ya pageant jenjang tulutiba lir, ta Puchö-i ashi.

Iba tetoktepba reprangsü asoshi ticket tem adokogo aser Kohima nung aliba café ajak nung angutsü aser pageant agiba anogoa angutsü, ta ashi. Ticket ya ka nung senpat 300, 500 aser 1000 alitsü.

Miss Tseminyu 2023 shimba sülen tetokteperte tenüng sangdongtsü, ta pai ashi.

BASN ajanga ayongzükba iba sentong ya Antodya Skill Foundation aser Atomy India nati present asütsü.

Eastern Nagaland Women Organisation ajanga kin tenet nungi tetsürtemi shilem magitsü pangzung renema aliba ama ENPO district trok nungi shilem magitsü, ta BASN Press and Media Secretary, Sarah Naam-i metedadkstsü.

ENPO ajanga iba pangzung ya 2018 küm renem aser iba sülen state beauty pageant nungya ENPO area nungi shilem magir.

Taküm Wokha nung district level pageant magiteta ajanga Wokha nungi contestant kata mali, ta parnokisa ashi.

Academic exam tem aliba ajanga taküm iba sentong nung Hornbill Festival nung madentsüa akumer, ta BASN ketdangsür temi ashi.

**Dimapur nung mejangjaba nisung tasü mang ka nguteta lir**

**Dimapur, Yimpoksüi/Nov. 24 (TYO):** Dimapur Police ajanga sangdong ka nung ashiba agi,

Shyam Cycle Shop, A.H. Road, Dimapur anasa Muslim Cemetery indang atsü/tezülen mejangjaba nisung tasü mang ka nguteta lir ta November 24, 2023 anepdang 8:45 ako meta telephone ajanga osang arua liasü.

Iba osang angazükba sülen East Police Station, Dimapur nungi duty party tem iba tesem bushia ao aser Muslim Cemetery indang atsü/jara tezülen nisung tasü mang ka neptener liasü.

Iba nisungba ya arishi küm 20 nungi 25 tsüngta asütsü südi ta ashi.

Independent witnesses anati repranga lia iba nisung

tasü mang ya repranga liasü saka temolung malemtsü kecha meliasü.

Tenük kuli alirtemi ashiba agi, iba nisungba ya talidak ki mali ka asütsü südi aser shiranga asü südi.

Oziung agi melaba maparen ajunga inyakba sülen tasü mang ya post-mortem examination atema District Hospital morgue nung yua lir.

Nisungba ya anüng sentsü tula ka, Nike polo T-shirt sentsü tanak ka, navy blue Nike track pants aser sandal tanak sema liasü.

Kibur/kinunger/tembar temi Officer-in-Charge, East Police Station, Dimapur den Mobile number 7085055020 ajanga tongteprateptsü metedadkstsü, ta sangdong ajanga ashi.

**DC Kohima ajanga Parking Charges metedadkstsü**

**Dimapur, Yimpoksüi/Nov. 24 (TYO):** MLCPs telung nung trial period ita asem atema

Parking Charges atema Deputy Commissioner, Kohima, Kumar Ramnikant-i totuyuba ka agütsügo.

Gari telemsa balala dang sen yamai meshitsü - 4 wheeler ghonda ka anena ayuba atema den 10 meshitsü, iba sülen ghonda shia sen pongu-ngu (5) aser two wheeler asoshi anogo ka atema sen 10 alitsü.

Four wheeler atema Day rate aser Night rate ya ita shia sen 1500 alitsü.

Multi- Level Car Parking tajungtiba nung ketdangsütsü

asoshi Permanent Parking of Vehicles ya MLCPs designed capacity shilem 50 malemtsüla, ta ashi.

MLCPs ketdangsür temi MLCPs telungzük nung traffic signages shidak inoka ayutsüla, lenmag tezülen tapi agi gari anena ayuba nokdangtsüla aser iten signages ya traffic police den angatetepa inoktsüla, ta ashi.

BOC area nung traffic mesü menangba ajemtsü mechi local taxi tem PR Hill MLCP nung anogo ka atema taxi shia sen 50 meshir anena yudakstsü aser iba totuyuba ya tang nungi amshiyonga aotsü, ta sangdong ajanga ashi.

## Shilula T-i State Level Tribal Painting Competition akok



**Kohima, Yimpoksüi/Nov. 24 (TYO):** Hopta tepiyong Jan Jatiya Gaurav Divas 2023 benjongmung amungba nung shilem ka ama Tribal Affairs Department ajanga DUDA Conference Hall, Kohima nung State Level Tribal Painting Competition ayongzükba nung Government Higher Secondary School Thangjam, Tuensang nungi Shilula T ajanga tematiba takok ngua liasü.

Nagaland kübok district balala nungi kaketshir 14-i iba sentong nung toktepa liasü, kong Shilula-i mezüngbuba

jenjang ngutet, Cannan Christan Higher Secondary School, Mokokchung nungi Anguvika Kinimi-i tanabuba jenjang aser Christian Mission Higher Secondary School, Chümoukedima nungi Ruyivelu Phesao-i tasembuba jenjang nguteta liasü.

Iba sentong tenzüka jembidang Joint Secretary, Tribal Affairs Department, Hito Sema-i ashiba agi, Jan Jatiya Gaurav Divas dang ya Tribal Pride Day ta ajar aser ibai India nunger nüjiso asoshi raraba tejangja nisung, Birsa Munda asoba anogomung

bilemteta amunger. Ibai November 15 nungi 22 tashi Azadi Ka Amrit Mahotsav amungba nung shilem ka amai lir aser ibai kin balala jangjateta ajaklen terenlok asoshi sentong yanglutsü atema lir, ta pai ashi.

Paisa takok angurtem nem senpet yamai amoktsü - mezüngbuba jenjang angur nem sen 20,000; tanabuba jenjang angur nem sen 15,000 aser tasembuba jenjang angur nem sen 10,000 den kulizing kaket. Iba sentong nung onir Tribal Affairs project officer Imsumeren liasü.

MLCPs telung nung trial period ita asem atema Deputy Commissioner, Kohima, Kumar Ramnikant-i totuyuba ka agütsügo.

Gari telemsa balala dang sen yamai meshitsü - 4 wheeler ghonda ka anena ayuba atema den 10 meshitsü, iba sülen ghonda shia sen pongu-ngu (5) aser two wheeler asoshi anogo ka atema sen 10 alitsü.

Four wheeler atema Day rate aser Night rate ya ita shia sen 1500 alitsü.

Multi- Level Car Parking tajungtiba nung ketdangsütsü



November 24, 2023 nü Rashtrapati Bhavan, New Delhi nung linük Tir, Droupadi Murmu-i HIPA, Gurugram nung 98buba Special Foundation Course agir officer trainees den senden amenba sülen tangokba noksa nung angur.

## Sorkari Indian Navy 8 atema temepishiba agütsüba Qatar-i agizükogo

**New Delhi, November 24** temelaba agütsüogo; navy officer 8 nem tasüba officer temji maneni India temerenshi obendang agütsü. kati taoba mapang Indian navy 8 nem tasüba temerenshi obendang agütsüba sülen India sorkari Qatar nem agütsüba temepishiba ken o ka Qatar-i official süa agizükogo, ta Hokolbarnü osang ka ajanga metedaktsü.

Ministry of External Affairs (MEA)-i India nunger ti anema tasüba temerenshi obendang agüja alibaji reprangshitsü mepishia liasü.

November ita tetenzüklen MEA otongdar, Arindam Bagchi-i, pua aliba India nungertem ajurtsü atema Doha nung aliba Indian embassy nem

Iba ken o dak sendakba nung External Affairs Minister, S Jaishankar-ia kanga nendaka inyakdar. Paisa October 30 nü navy officer tem indang kibong züngsemtem-a ajurua sorkari akokba tashi yaritsü, ta shia parnok melung sünepja liasü.

October ita Qatar nung court kati iba obendang agütsüba sülen India-i parnok atema temepishiba ken oji agütsü.

October 26, 2023 nü Qatar nung aliba Court of First Instance-i taoba mapang Indian

## Afghanistan-i India nung teti atema diplomatic mission shibanger

**New Delhi, November 24** (Agencies): Hokolbarnü Afghanistan Embassy-i New Delhi nung parnok indang diplomatic mission teti atema shibangba osang metedaktsüogo.

Iba telemtetba ya November 23 nungi mapa küma benoker, ta Afghanistan Embassy-i metedaktsü. Taküm September 30 nüa parnoki diplomatic mission shibanga liasü.

Afghan Republic nungi ketdangsertem ajaki India toktsür ogo. Tesüba küm 22 tashi India nung Afghan Republic indang diplomatic mission liasü.

Afghan Embassy-i sangdong ka ajanga, "India sorkar tsütsülen nungi tayongzükba maneni aliba ajanga November 23, 2023 anogo nungi Afghan diplomatic mission shibanger. India sorkari mission sademsadema

inyaksangshidaktsü, ta teimla nung tamalen embassy-i khenpiga atema mission anena liasü," ta metedaktsü.

"India nung aliba Afghan sensotem dang ya ashir-nenok tangatetba aser asen mission aliba mapang piyong nenoki nungitba atema Embassy-i nenok ajak dang pelar," ta parnokisa metedaktsü.

2021 küm August ita nungi India nung Afghan nunger nütsüng shilem tesadang shi ajema kümogo, kechiyong Afghan nunger refugees, kaketsirtem aser shishilembartem aikati linük toktsür ao aser India sorkaria Afghan nunger nem visa tasen tera dang agütsür.

Afghan embassy-i October 1 nungi mission mapa anena liasü, aser ibaji 2021 küm Taliban-i Afghanistan nung sorkar atsüngdokba sülen rongsenkettzung tsütsü timtem ajanga liasü.

## Sorkari H9N2 wara atema renema dang lir: Health Ministry



**New Delhi, Yimpoksü (November 24)** (Agencies):

Union Health Ministry-i northern China nung H9N2 wara pokteta tanurtem tangu sashiba dak sendakba ajanga shirangba tensa mita dang reprangdar, aser sorkari iba tensa atema renema dang lir, ta metedaktsü.

Hokolbarnü Ministry of Health and Family Welfare-i sangdong ka ajanga, India linük nungbo avian influenza ya atongtsüsab masü, ajisüaka iba wara prokra iba atemaji health ministry renema dang lir, ta metedaktsü.

Tanurtem dak iba wara tonga prokba osang sangdongba sülen World Health Organization (WHO)-i China dang iba wara dak sendakba osang tejangja agüjang, ta mepishiogo.

WHO-i sangdong ka ajanga, China ketdangsertemi tangu sashiba dak sendakba wara aser tanurtem pneumonia agi shirangba osang metedaktsüogo, ta metedaktsü.

Shiranger tanurtem rongnung kar dak influenza, kar dak mycoplasma pneumoniae, respiratory syncytial virus (RSV) aser SARS-CoV-2 putet aser item

wara ya taküm October ita tomllen nungi northern China nung proker.

WHO-isa China nung alirtem dang iba tashidak prokba nokdangtsü atema vaccine agütsütsü, nisung tsüngda pilaa alitsü, shirangertem kidang dang amongtsü, mapang shidak nung medical teyari bushitsü, masks agitsü aser mapang shia teka shidoktsü metedaktsü.

Tawa India nunga Director-General of Health Services leniba nung senden ka mena India nung Avian Influenza nokdangtsü atema terenemshiba jenjang asadanga liasü.

Union Health Ministry-isa sensotem dang PM-Ayushman Bharat Health Infrastructure Mission ajanga tang aliba waratem aser tarutsü nung prokba wara mapang shirangertem maneni anepalutsü atema rangloker inyaker, ta metedaktsü.

Talisa Integrated Disease Surveillance Programme (IDSP) kübok surveillance aser detection networks ajanga coronavirus wara mapang nung tayongzükba balala nungi aika ajangshia tangazükba kaogo, ta Health Ministry-isa metedaktsü.



November 24, 2023 nü Jammu nung Jammu & Kashmir Lt Governor, Manoj Sinha-i Rajouri district nung kiralongrartem den khatepdang asür sepaitem nem akhüm agütsüba noksa nung angur. Bodhbar-Brihostibar anogotem nung Rajouri district kübok Bijamaal area nung kiralongrartem den ghonda 36 shi khatepdang sepaipongu asü.



GOVERNMENT OF NAGALAND  
DIRECTORATE OF INFORMATION TECHNOLOGY & COMMUNICATION  
(Below New Secretariat) Thizama Road  
Nagaland : Kohima 797001

No. DIT&C/EST/SDC-62/2013(Vol.II)(Pt.)

Kohima Dated 23rd November 2023

### NOTICE INVITING TENDER

The Directorate of IT & Communication invites tender for Software Management and Delivery and Installation of IT Equipment for Existing Nagaland State Data Centre(NSDC) of Government of Nagaland.

The detailed tender documents can be viewed / downloaded from the following website, from **24th November 2023 to 12th December 2023**:

1. [www.nagalandtenders.gov.in](http://www.nagalandtenders.gov.in) 2. [www.nagaland.gov.in](http://www.nagaland.gov.in)

Amendments/Corrigendum, if any will be hosted on the above website.

Sd/-  
Er. SabouYashu  
Director, IT & C



## TIR YIMYIM YIMOBILEM (EDITORIAL)

DIMAPUR KÜPTPKNÜ, YIMPOKSÜ (YIMPOKSÜ) 25, 2023

### Aori kechi ashir ?

**N**agaland nung tangar kintem aikati Aor majung indang jembir aser aji kecha manganütsü mali, majung asüba agi majunga ta jembir. Atangji, Aortemi inyakba ajakbo tamajung masütsü akok mesüra Aor ajaka majung masütsü akok. Ashiko, Aor karibo kenü tesem ka nungbo tangar asoshi tajung tilakabo inyaker asütsü akok, saka itemji masü Aortemi memeimba agi aser ashiocksüba agi timtem ajuru ama aser tajungmeküttet ama Aor nüngsen jembir aika kümogo. Ajisüaka, tamajung jembitsüba ajakji tamajungbo masü aser nüngsen jembiba nungjia tebilemdangtsü aser tagitsü keta lir. Aji oda, kibong nung tamakok aser tebilemtsü ajurudang kinungtsü aser tanurtem ajaki tebuti aitsü ama aser tsüraburtemia tambusang mesüra tantsüla aitsü ama shirnok dak teimla lir aser shirnok dak temulung lema jenoker, timtem mapang parnoki taitsüba angur aser nüngsen khuret ajak parnok nem benloktsür. Idangji tebuti 'Jagi hau-er ni taia' ta agizüker aser kibong timmedemdaktsü aotsü atema meranga inyaktsü tenzüker. Kasaji, kibong nung tantsüla aser tambusangia tsürabur shisamebuludaktsü aser tenu nungertem mejashidaktsü tsüraburtemi abentsüba khuret lemsatepa abener. Iba ama kibong tia denji tanü Aor tia medemdagra, asenoki asenoksasa asenok aibelen, tashimait, tamakok meteta arutsü aser asenoki inyaktsüba mapatem indang tali khuretsa bilemtsü. Tanü tangari asenok majung indang jembabaj asenoki tajung inyaktsü imlabu agi jembir ta asenoki angatetdi, anungji tangari asen indang majung tali jembili asenoki tajung inyaktsü indang tali bilema inyakli ta süra majung jembir o tajung inyaker naji yakta tepela lenjem nung ajuruteptsü. Asenoki rajema metetsüba kaji, asenok indang majung jembiaka parnoki asenok dakang temulungbo alemer. Ibayongji tangar den masü asenok den dang linür aser kasa mapa inyaktsüsa asüyonga asenok den külemi inyakner. Ashiko, asenokibо joko shingaia asenok dak temulung malemer amai bilema alitsüa akok, saka Naga nunger asoshi tongtibang onük ka benoka jembitsü süra tamasa 'Aori kechi ashir ?' ta asüba olaji tanüa tangar bang nungi adoker. Iba lagi asenok dak tashimait aika liaka tangari asenok dak temulung lemtetba sayur aser asenok menjang aser teinyaktsü khuret jangjar. Ajisüaka, asenoki asenok menjang reprangdangra asenok lokti menjang ya tangari majung jembitsüba dang nungi tamajungba tia nung lir. Tangaribo asenok den linür aser mapa-a asen mapa dang inyakner saka asenoki parnok nemji leniba tajung magütsütter. Yimten aser lokti nunga tebilemtsü ajurudang asenoki kechi ashir (?) ta tangar ola madoki atar saka asenoki kecha mashir. Iba lagi tanü Naga nunger mangmanger. Aorbo nisung ajak tajung süra, kechiba Aor lokti aser Aor yimten majung ta shisadangtsüba mapangji tang ya lir. Aor jungra Nagaland ajungtsü, anungji mapa ajak nung tangar ajak dang nungi Aorsa tajungba asütsüba Tsüngrem asenok nem agütsüba maongka aser khuret asütsü. Ajisüaka, asenoki khuret maginer aser mebener saka maongka dang aginür. Tanü tangari Aor nüng asenbajji iba nung lagi tenzüker. Maongka ajak asen meyong aser khuret ajak tangar meyong ta serbo lokti ka longjema moutettsü. Maongka dang agitsü aser khuretbo mabentsü ta asür sülen shirnokibо jangratema anidaktsü ? Tanü asenoki Naga nunger yimten aser lokti khuret benang teben, tangaribo Naga yimten tebilemtsü tatem kuma melatettem telokang teimba kuma lemsar aliba tebilemtsü koktettsü asoshia Aori kechi ashir ? Tanü Nagaland anüdoklen alir Naga nungertem Nagaland nungi balaka razuka onüba onük nunga Aori kechi ashir ? ta metetnür. Item olaji Aor kija kijai masü saka Aor inti lokti tentettemi Aor tenüng nung Tsüngrem dang shisatsü meshia Aor tashitemeter aser tebu tedi tajungtem den shisalemteper langzütsü tim. Iba amaji ka Aor lokti tentettemi inyaktetra, Aori langzüba o ji Naga nunger asoshi tadongtsü ka tonga anitsüba ajok asütsü. Aor indang majung jembiaka, tanü tashibo Aorji tashitemeter, temeim aketba nübortem aser Tsüngrem metetba kin ta tangari züngshidagi, ibaji yazu mesüdaktsüli.

## OLEMSABANG

### AO BAPTIST AROGO MUNG DANG (ABAM) Differently-Abled Persons' SUNDAY November 26, 2023

~ Rev. Dr. Mar Pongener,  
Executive Secretary, ABAM

United Nations General Assembly ajanga International Day of Persons with Disabilities (IDPD), küm shia December 3 nü tesem ajaklen amungtsü 1992 nung ayimokja tenzük. Yamaji alima kin balala, lokti tentet balala aser tamangba lokti balalai iba anogo 'Yimya balaka nung Inyaktettem' (Differently-Abled Persons') nem tenüngsang aser akümtsüba agütsüba den 'Tsüngremi taküm shiaji amajok atema yanglubatem masü saka Pa sentong atalokdaktsü asoshi yanglu' ta angatetdaktsü nükjidong nung 2023 kuma December 3, nung amungtsü. Iba anogo temoatsü nung amungtsü nükla yur ajaklen sentong balala renema mapatem inyak tenzükogo.

Ao Baptist Argo Mungdang (ABAM) ajanga iba ministry ya kanga tongtipang ta angateta 2010 nungi tenzüka anogo ka shiteta sarasadema 'Yimya balaka nung Inyaktettem' nüngtem nung munga arur tangbo küm shia November ita nung Deobar ka agiteta arogotem ajak nung sentong agia arur. Ano tali tajungba aser tabensaba nung agitetsü nükjidong nung November ita Deobar anogo ka shiteta mungyonga arur. Yamaji 2023 atema November 26 (Deobar) anogo nung 'Differently-Abled Persons' Sunday' amungtsü ABAM Calendar nung enoka lir. Ano Social Concern Ministry, ABAM ajanga küm tepiyong mapang aser nüngdak apir sentong balala renema agia arudagi. Talisa taoba küm SQC amungtsü renemba mapang asen adianutem asoshi sentong ana kanga takok ngua agiogo. Iba sentong agiba ajanga aika temoatsü anguba osangtem tanü tashi angashia arudagi. Iba den külemi arogotem nung mapang shia tapet sentong balala yanglue agiba ajanga aseni meima aliba adianutem den lungjema aika temoatsü agidar.

Tsüngremi nisung yangluba ya nükjidong tejangja yur tabensa nung yanglu. Idangji Tsüngremi ashi, "Tang asenoki asen mesükba nung meimchir yangludi; ... (Lipok 1:26). Tsüngrem mesükba nung yangluba meimchir taküm kaji tabensa nung yanglu ta jangja angatetdaktsü. Meimchir tangatetba nung tashi mait aliba ajanga metemsüba mesüra mabensaba indang tali jembir saka nisung ajakji Tsüngrem tsüngdangbo tetemsü aser senti takümtem lir aser itemji Pa sentong atalokdaktsü asoshi yanglu. Tsüngremsa shisa takaba anungji Pai nisung shia yimya balala, sempet balala, tereprangtsü balala, tashi balala, tekolok shisatsü balala yanglue toktsü. Item ajak lagi Pa tematiba tenüngsang peridaktsü asoshi yanglu. Yimya balala nung nisung ajaki mapa balala inyakteter. Kati inyakba yimya nung kati meinyaktetba lagi pa/la/la mabensa ta ashitsüji Tsüngrem anema aiblener ta metetdi. Alima nütsüng yongsük nung 16% yimya balala nung inyaktettem lir ta ashir. Parnok sempet aser tashiji ajaki apayua aser akümtsüba agizüktetsüla kechiaser ajakji Tsüngrem sentsüwangshi asoshi yanglue lir (Isaia 43:7).

Kati ka ajemrepba tokstsü merangba tanelia, tangar ka nemja bilemba, mezüngmeshitepbä, menütsüba, medemer mesüra kenunger mesünuba aser temeim nung sadanga meimba, item amala tangatetbatem aliba ajanga asenoki Tsüngrem sentsüwangshi mabensadaktsü. Khristai meimba ama kati ka dang meimba (Yohan 15:12), ambangiyim aser asüküm agi masü saka ajemalu shisatsü agi pei tang nungibö pi taoba ta züngshiba (Filipi 2:3), tangar tang jungnuba tanelia akaba ajanga temoatsütem ajangzükteta litetba (Api 11:25), tangar asoshi tamajung tasa asaa mashikoshi mapatem inyakba (Api 6:14), pei tashi mait aser mabensabatem tali jangja anguba (Mathi 7:1-5), item amala jakla aser tangatetbatem melenshitsü merangdi.

Taküm (2023) iba anogo asoshi sarasadema sentong balala ayonga akaba den, nisung ajak ya tongtipang aser Tsüngrem yanglubatem lir ta tali jangja angatetba mapang ka südaktsüdi. Teti agia aruba sentong ka ama zübazüba amungba nung tajangzük aser temoatsü mali. Saka tangatetba tajung yur iba anogo asen mekuta aliba adianutem den temoatsü mapang agitetsü sentongtem yangludi. 'Yimya balaka nung Inyaktettem' den mapang endoktsü, ajungshiteptsü, külemi lai zünga sarasademsü, asen akaba lemsateptsü, temeim o lemsateptsü, tasu itdaktsü aser Tsüngrem sentong angateta liyonga aotsü ajungshitepbä mapang ka südaktsüdi. Asen adianutem asoshi temeim mapa kar inyaktetba lagi Tsüngrem sentsüwangshidaktsü ta meteta 'Differently-Abled Persons' SUNDAY' ajak asoshi temoatsü südakjangma.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerı angateta agitsü mepishir

Tamangertem temenen dak alaka kecha metsübutüsüla: Rev. Naleo



November 23, 2023 aonung Rüzhükhrie GHSS Ground Kohima nung Kohima Bible College (KBC) Golden Jubilee sentong nung Kohima Ao Baptist Arogo (KABA) Choir-i ken atendang tangokba noksa nung angur.

**Kohima, November 24 (TYO):** Rüzhükhrie GHSS Ground Kohima nung Kohima Bible College (KBC) pur Golden Jubilee mong tasemnübuba sentong nung tongti o jembirji Life Transforming Ministries tentetsang aser Tir, Rev Dr. Putsato Naleo liasü.

Brihostibar nikongdang Jubilee sentong nung jembidang Rev. Naleo-i pa taküm nung Tsüngrem ajangshiba lemsatepdang pai, "Pa ya tesüngmangtsü Tsüngrem ka lir aser asenoki anogo shia Pa metettsü meranger," ta ashi.

Tamangertem pei lenmang nung mechimira kenü anogobo Khrista nung shia arutsü aser

Yisu Khrista tejak chitepa ajurutsü, ta pai ashi.

Paisa, iba College ajanga Tsüngrem tenzükertem aika adokdaktsügo, ta ashi.

Paisa tamangertem dang temenen dak alaka kecha metsübutüsü saka Tsüngrem metettsü dang jangratsü ayongzük.

Tongti o jembirisa Khrista dak amangertem dang ata-aa malitsüla saka renema aliba den külemi alima nung tebilemtsü onüktem angateta tang ama tensa ka nung Khrista osangtajung proktsüla; ajemajema malitsüla saka mission mapa tenzüktsüla, ta ayongzük.

Sentong tetenzüklen Nepal-Butanese Evangelical

Assembly, Harrisburg, USA nung pastor, Bhim-i Jubilee salem osang lemsatepa liasü.

Iba sentong ya taoba mapang KBC nungi graduate asür aser tang Rengma Baptist Church, Kohima nung Associate Pastor, Ayhulo Kemp leniba nung agia liasü.

Kasa sentong nung Vikuno Temi aser Kohima Ao Baptist Arogo choir-i ken aten.

Hokolbar aonung taoba mapang KBC nungi graduate asür Kekhriengulie Kuotsu leniba nung sentong agi aser taoba mapang KBC nungi graduate asür aser International Restoration Church Austin Texas, USA tentetsang aser pastor, John Monger-i Tsüngrem O jembia liasü.

**Jordan nung Arogoitakümbo Khristmas benjung mamongtsü**

**November 24, 2023:** Tang jembidang putir, Rifat Bader-i, "Onoki Khristmas mapang benjung tema tereprangtsü ajak thiogo. Yisu asoba- chichiba Khristmas nung dang rangloksü atema iba telemtetba ya agi. Iba ya Gaza nungertem den tejashi lemsateptsü atema lir," ta metedaktsü.

Jordan Council of Churches-i sangdong ka ajanga, Gaza nung Palestine nunger civilian aliba tesemtem nung nüburtem timtemba atema tebilemtsü katsüba lemsatepa onoki Khristmas benjung aser sentong ajak thinentsü, ta metedaktsü.

Gaza aser West Bank nung tai maket civilian aika asüba atema parnok nem akhüm agüja Jordan Council of Churches-i Khristmas benjung mamongtsü saka iba mapang nung tekülem agiba den sarasadem dang agia amongtsü telemtetba agi.

Jordan Council of Churches-isa, takümbo Khristmas bazaar malitsü, tanurtem nem sempet lema magütsü, benjung sübotsü meinoktsü aser scout parades magitsü, ta metedaktsü.

Taoba ita Israel-i Gaza amak tenzükba sülen tang tashi nung Gaza nung nisung 13,000 jungüa süogo, aser ano iba dang nungjagi teimba asütsü, ta

Takümbo Bethlehem nunga Khristmas benjung mamongtsü.

West Bank kübok aliba Bethlehem yimti ya Yisu Khrista asoba yimti lir. Takümbo Bethlehem nung benjung sübotsü ajak agizükogo.

Tamalen Bethlehem Municipality-i, "Bethlehem Municipality-i küm aika tejaklen Khristmas benjung sübotsü inoka aliba agienadoktsü sangdongogo. Gaza nung asürtem aser ozü nüburtem nem akhüm agüja benjung sübotsü ajak agienadoker," ta metedakja liasü.

Bethlehem municipality otongdar kati, "Kuliji Palestine nung tang tensa ajanga lir; nüburtemi benjung amongtsü mejangrar. Parnok jashir aser mepalar. Gaza nung ozü nüburtem dang taochi mesayui jenti tepsedtar," ta metedakja liasü.

Ajisüaka Khristmas mapang Bethlehem nung tekülem sentong aser sarasadem sentongtembo agitsü atema temelaba agütsü, ta ketdangsertemi metedaktsü.

Hamas Health Ministry-i

## ANOGO ABEN TSÜNGREM DEN

### Mamangertem den süngra mesütepi külemi teputep

- 2 Kor. 6:14

Satiba masüngteti aliba ajanga Kibong lanu aika nung teraksa adoker. Satibaji süngra ka lir. Süngra mesütepi külemi apotsü Laishibai memelar (2 Kor. 6:14). "Nai nashi ka aser gado ka külemi alu meladaktsütsüla" (Tazung. 22:10).

Tejen aser Tasen Lai anapronglai mamanger den sati masütsüla ta aitsür. Temeshi metsü mamanger den meyokteba dangji ozüng raksaba aibelenba ta ajar (Ezra 9:1-6). Amitsüra mamanger den satitsü memelar. "Kinüngbo süra lai shiba dangi onüdir, la mulung, saka Kibuba dak amanger rongnung dang la keyi odakjang" (1 Kor. 7:39).

Tsüraburi mamanger den alitsü shiaka, kechi kuli südir süang nai aji magizüksüla. Tsürabur dang tashi angabajia Kibuba nung asütsüla (Ef. 6:1). Na mamanger ka den meimtepa lir, nüdongji tamanger maküm tashi temeimtep. Sati asütsü atema dang batiptsübaji Kümdangang!

Karbo kibong küber külen amangtsü akok. Saka iba nungi ochibaji madoktsü akok. Laishibai ashir, "O kinüngtsü, nai kinüngbo kümzüksü asü masü, nai koda metet? Mesura, O kinüngbo, nai kinüngtsü kümzüksü asü masü, nai koda metet?" (1 Kor. 7:17). Satibaji kanga Kümdanga agitsüba mapa lir. Nai aibelena mamanger kati sati sur lira, nai pa/la tekümtet asoshi sarasademtsütsüba dak alema tang kecha inyaktsü makok.

Kibong asüngtetta maliba lagi tarutsü putu raksa ta metetta Khristan ministertemi ibai kanga nendaka angattdaktsütsü tenüngdaktsü. India nunger sobaliba nung tanga tamang yimsü pur ka den satira pa/la par telok nungi jentoker. Arogoi itemji junga anepalutsüla aser yaritsüla.

## Mali nung tepuokdak alirtem aikati Khrista agizük

**November 24, 2023:** Mali "Parnok rongnung miim o nung Khristan telok kati jail ka jembi tenzük aser karbo tenük semdanga Khrista osangtajung nung nüktü tsüngranger angu," lemsatepa ajanga tepuokdak ta ministry lenirisa alirtem aikati Khrista metedaktsü.

Ano tesüngmangtsü kaji-jail ketcangseria, "Tsüngrem tsüngdang ni aibelena lir. Tsüngremi ni yariang ta ashi," ta paisa metedaktsü.

Khrista osangtajung lemsatepa sülen jail ketcangser densema tepuokdak alir aikati parnok atema sarasademjang, ta mepishia liasü.

Christian Aid Mission nung inyakertemi tashi mangaba, temenen aser Yisu Khrista ajanga tekümtet anguba indang lemsatepa liasü. Kin balala nungi adenshiba tepuokdak alirtem aika tang mezüng Khrista osangtajung angashia Khrista agizük, ta ministry lenir kati metedaktsü.

Parnoki sayutsüngiba mapang nung tepuokdak alirtem aika temelung anüka aküm aser parnok rongnung kati mezüng, "Ni aibelenogo, iba nisungba yagi ochi ojembir. Tsüngrem ni yariang," ta ayimdena liasü.

Anogo ishika lir jail ketcangser phone ajanga Christian Aid Mission nung inyakertemis tepuokdak alirtem ajak nem Laishiba lema agütsü.

**AO OSHI ANGAZÜKDAK:**  
**TANÜ ANGAZÜKTSÜBA OJANG**
**Senbang**

- (v) teloki mekütbang (surrounded by crowd)  
 \* Auer ka teloki senbang aser merenshia liasü.
- Senchi**
- (n) aibelener dang temerenshi sen agiba (fine, penalty)  
 \* Ochimashir dang yimteni senchi tulu achir.

**OLONG PAITEP # 6624**

1	2		3		4		5
			6		7		
8							
				9			
			10				
11							12
			13		14		
15							
16					17		

**TIPLÉN**

1. Nüji masü  
 3. Techinütsüka  
 7. Aketa shirangba  
 8. Pi  
 9. Amena  
 10. Kinü  
 11. Tanang masü  
 13. Lenmang  
 15. Nübo tedi  
 16. Tuoshi  
 17. Shiruru apuba temenatsü

**LANGTSÜNGLEN**

- (4) 1. Jila tulu - (5)  
 - (6) 2. Sarasadempang tembang - (4)  
 - (5) 4. Tarutsü indang ashirtem - (6)  
 - (6) 5. Alia - (5)  
 - (5) 6. Mojing - (5)  
 - (5) 9. Tai inyakba metet - (5)  
 - (6) 10. Medemer chijiba - (6)  
 - (5) 11. Tatokba / Amadok - (5)  
 - (6) 12. Anüngdang masü - (5)  
 - (4) 14. Jabaso masü - (4)

**OLONG PAITEP # 6623 TELANGZÜBA****TIPLÉN :**

1. Tesangra, 5. Mungo, 7. Kisen,  
 8. Salem, 12. Semki, 14. Kilem,  
 15. Kensü, 16. Sangpang.

**LANGTSÜNGLEN :**

1. Temesen, 2. Raksa, 3. Aon,  
 4. Aso, 6. Nile, 9. Alizüng,  
 10. Omen, 11. Lemta, 13.  
 Ola, 14. Kin.

**NAI-A YA METETTER MA**

Union Road Transport Minister Nitin Gadkari-i Assam nung gari lenmang mapatong ana inyaktsü atema Rs 2,185.43 crore lebzüktü. NH-17 tuluba kuma yanglutsü atema Rs 1,338.61 Crore aser NH-137 nung Tamenglong-Mahur section Widening & Upgradation atema Rs 846.82 Crore lebzüktü.

Arunachal sorkari mapa inyaker nisung 250 anentsü

**Itanagar, November 24, 2023**  
**(Agencies):** Arunachal Pradesh sorkari education department nung tim mesüi mapa nung shimoker nisung 250 mapa nungi anentsü.

"PRTs, TGTs, UDCs, LDCs, aser MTS aikati tiyazü appointment orders amshia mapa nung aitba putetogo" ta Arunachal Pradesh education department-i metedaktsü.

West Siang district nung sorkar mapa inyaker 102, Changlang nung 72, Anjaw nung 26, East Siang district nung 18 aser Longding nung 10 mapa nungi anentsü.

Maneni, Upper Subansiri nung sorkar mapa inyaker 8, Tirap nung 2, Kurungkumey nung 6, Itanagar Capital Region nung 3 aser Lohit o Lower Siang nung pezüü anentsü.

**MENUR AMAI SAKA TSÜNGREM TEMEIM KOPAYUA TA ASEMJUNGBA SEMCHIRTEMI PELABA SANGDONGER**

15th August 2023 anogo nung Government-i temelong süa (chia) Wt. Jongpong Gudes DISTRICT TRAINNING COMMISSIONER social service nung Award sempetsüba asoshi Govt. dang kanga pelaba sangdunger. La ya Mangyangnokcha GHSS nung inyaker.

Ano iba den Govt-i temelong doka Asangma Govt. High School nung Headmistress mapa inyaktsü nungloksü.

Anüngji koba naroküm den temaba maparen inyaktsü nungloksür ibaji pei sasa agi masü saka tiyar Tsüngrem dang tashi meshia inyaktsü Obou asu-temi sarasademsür.

**Sd/-**

1. L. IMLI IMSONG TATAR
2. TSUNKNUNG IMSONG TATAR
3. AKANGLEMBA IMSONG TATAR

**NPP-i Lok Sabha elections atema tetsür 2 shimer****Shillong, November 24, 2023**

**(Agencies):** National People's Party (NPP)-i 2024 Lok Sabha elections nung tetsürtem dang toktepdakstsü lemtetogo.

NPP-i Shillong Parliament menden atema Cabinet Minister aser Laitumkhrah MLA Dr. Mazel Ampareen Lyngdoh shim

aser külen Tura MP Agatha K Sangma nem maneni Tura Parliamentary menden atema ticket agütsü.

November 24 nü Shillong nung aliba party headquarters nung NPP State President Prestone Tynsong-i iba osang metedaktsü.

NPP-i la dak temulung lemtetba atema Dr. Mazel Ampareen Lyngdoh-i pelaba metedakstsü.

Yimtenren mapa nung tetsürtemi tongti shilem agitsü nüngdaker aser iba ajanga tangatetba balala bener arutettsü, ta Ampareen-i ashi.

**All Assam Students' Union (AASU) mendenpur tasen shim****Guwahati, November 24, 2023 (Agencies):**

Morigaon nung All Assam Students' Union (AASU) convention nung Utpal Sarma-i President aser Shankar Jyoti Baruah-i General Secretary inyaktsü shimogo.

Taoba AASU President Dipanka Kumar-i sodi meshiba sülen Hokolbari mendenpur tasen shimsü telemetba agia liasü.

Nath-i president menden nungi sodi agiba sülen Utpal

Sarma-i iba mapa inyaka arua liasü.

"Ni bendanga agüja inyaktsü. Nübortemi ni pusema nungittsu aser temeim o temoatsü agütsü imlar" ta Sarma-i ashi.


Morigaon nung alirtemi AASU 18 buba convention nung adenertem pelashishia agizükba atema kanga pelar ta paisa ashi.

Shankar Jyoti Baruah-i General Secretary inyaka liasü aser pai ano maneni AASU

Speaker ama kümsük ka inyaktsü shimsü.

"Kümsük tanaben atema district balala nungi AASU teshimtet nübotem aser state-level executive members-i kü dak tamang kaa General Secretary inyaktsü tebilemtsü khuret agütsü" ta Baruah-i ashi.

AASU president Sarma-i Assam nung alirtemi dang maneni lisopurtem tebilemtsü asoshi inyakba nung yariteptsü ayongzük.

**Golden Peacock Award atema Karbi film 'Mirbeen' shim**

**Guwahati, November 24, 2023 (Agencies):** 54 buba International Film Festival of India (IFFI) nung Karbi feature film 'Mirbeen' shimba ajanga Assam film industry atema konang bentsür aruogo.

Golden Peacock Award atema film tajung 15 shimsü meranger. Ajisüaka 2005 küm telok o telok raraba aser kin o kin raraba ajanga la taküm lendongi ayir.

Assam nungi IFFI nung shimsü meranger. Ajisüaka 2005 küm telok o telok raraba aser kin o kin raraba ajanga la taküm lendongi ayir.

i produce asüba 'Mirbeen' dang lir.

Iba film ya Mirbeen taküm dak amendaker yanglu aser lai la tetsü Serdihun (the God of textile in Karbi tribal beliefs) indang otsütem ajanga ajungmesoa la taküm indang tetezü metettsü meranger. Ajisüaka 2005 küm telok o telok raraba aser kin o kin raraba ajanga la taküm lendongi ayir.

54 buba IFFI feature film category nung film tapu balala

aika shimsüta lir.

Golden Peacock Award atema 'Mirbeen' ajanga India nungi 'Sanaa' aser 'Kantara' den 'Woman Of,' 'The Other Widow,' 'The Party of Fools,' 'Measures Of Men,' 'Lubo,' 'Hoffman's Fairy Tales,' 'Endless Borders,' 'Die Before Death,' 'Bosnian Pot,' 'Blaga's Lessons,' 'Asog,' aser 'Andragogy' amala international film tem den tokteper.

## Israel-Hamas rara anogo pezü anena atar, saka rara matem

Jerusalem, Yimpoksü/Nov.

**24 (Agencies):** Israel aser Hamas tsüngta raraba mapang tatsüka asoshi Hokulbarne nungu anena ata tenzükogo, aser Israel nung Palestine nunger tepuokdak yua aliba chioktsü melena telungpur temi Gaza nung puer yua alirtem chioktsü lenmang lapoker.

Qatar, Egypt aser US ajanga rara khen atema anena atatsü jembitsüba ajanga hopta tenet raraba anena atar, kong nisung meyirijang aika tepsetogo. Rara anena ataba mapang tenzükli Israel mitkari rara ano metembang aser humanitarian pause ya khen asoshi dang lir ta ashi.

"Northern Gaza Strip ya lendong tulu aliba raradak tesem ka lir, aser north tsütsü aotsü nokdanger. Nenok kumzüka alitsü asoshi nenok south nung humanitarian zone nung dang alitsüla," ta IDF ajanga X nung zülu.

"Strip indang north tsütsülen nungi south tsütsü Salal al-Din Road ajanga dang aotsü akoktsü. Strip indang south tsütsü nungi north tsütsü

nübürtem aotsü memelar aser lendong lir," ta ashi.

Rara ya anepdang 7:00 ako nungi anen aser anogo pezü tashi anena alitsü. Iba mapang Gaza nung yimsü asüba Hamas teloki October 7 nü Israel amakdang pua bener aoba nisung 240 shi nungi nisung 50 chioktsü nangzüka lir. Iba melen Israel-ia pua alir nisung ka chiokba nung Palestine nunger tepuokdak alir asem chioktsü. Item nisungtem chiokba maparen ya mapang ka nung masü saka anogo pezü tsüngta meilongi inyaktsü.

Qatar, United States aser Egypt linüktem tetsüngta ia hopta aika jembishinür iba tezüngzüktep ya agia liasü. Hamas-i October 7 nü Israel nung nisung 1,200 shi tepset aser Israel-ia meyiper Gaza nung anüng aser alilen nungi amakdang Palestine nunger nisung 13,300 shi tepsetogo, ta Gaza Health ketdangsür temi ashi.

Pua alirtem rongnung nisung 13 mezung chioktsü aser parnok ya kibong kasa nungi tetsür aser tanurtem alitsü, ta Qatar

ketdangsür temi ashir.

Israel mitkar temi tekumdangtsü shiaka tesem balala nung aliba Palestine nunger temi northern Gaza nung pei ki bushia aotsü merang.

Iba mapang Israel sepaitemi nisung ana khaset aser 11 dak tetsüng nung akha, ta osang ajanga ashir.

Hamas indang political bureau nung züngsem Ghazi Hamad-i ashiba agi, teburtem densema tang Gaza nung pua aliba civilian tem timba chioktsü asoshi jembishinütsü molunga lir.

Ajisüaka Israel sepaitem pua alirtem asoshibo otsü balaka lir, ta Hamad-i osangbener dang ashi.

"Tangbo onoki civilian hostages tem atema dang jembir. Dangartem atemabo Israel detention centres nung aliba nisung 7,200 chioktsü aser melenteptsü asoshi lenmang bushir. Ibai onok nükjidong lir," ta Hamad-i ashi.

"Ajisüaka onoki ata alitsü. Aji inyaktsü onok dak tashi lir... Israel-i tepuokdak alir ajak chioktsüla, aser onokia Israel sepaitem chioktsü renema lir."

## Anünglaki satellite yokba ya pei temeden amshiba: Kim Jong Un

Seoul, Yimpoksü/Nov.

**24 (Agencies):** Linüki tang tesüsa spy satellite ya anünglaki yokba ya pei sasa pei kumzüka ayutsü temeden amshiba lir, ta North Korea lenir Kim Jong Un-i ashi. Iba ya ajanga alima nung tesem mashi ka nung maktettsü ta sayua Pyongyang benjoner.

North Korea-i spy satellite mezüngbuba orbit nung yutsügo ta Mongulbarnü ashiba sülen parnoki UN pangzung nung aibelener ta linük balalai aitsü, kong ballistic missile programs amshitetba technology amshiba nokdanga lir.

Kim-i National Aerospace Technology Administration semdanga space scientists aser technician tem nem tenüngsang agütsü aser tsükchir temi lendong aketba yimya aser tashiyim amshiba mapang Mongulbarnü iba satellite takok

ngua yoktetba ya tenük lapokba sentong ka lir, ta shia liasü.

"Reconnaissance satellite ya 'self-defense' tashi amshiba lir aser DPKR armed forces-i manentsü aser dangar nem mokokdaktsütsü," ta North Korea sorkar meyong KCNA-i ashi.

Iba satellite anünglaki yoktetba benjonga Brehostibarnü chiyongba sentong ka ayongzüka liasü, kong Ato Kilonser Kim Tok Hun-i ashiba agi, iba satellite yagi North Korea mitkar ya alima ajunga maktettsüa tashi aliba alima nung mitkar tajungba akuntsü.

Tan hopta iba satellite yokba ya North Korea-i taküm asemen merangba nung anaben tamakok ajurur Kim-i September ita Russia semdanga Tir Vladimir Putin-i satellites yangluba nung Pyongyang

yaritsü nangzükba sülen alitsü.

Tang tesüsa satellite yokba nungya Russian technical teyari densema alitsü akok, kechaser tang tesendaktep nung Pyongyang-i Russia nem artillery shells million aika agüja lir, ta South Korea ketdangsür temi ashir.

Russia aser North Korea nati nok-nü agi yariteptsü sentong mali ta ashir saka tesendaktep tali akangshitsü nangzük. North Korean satellite ya orbit telungi yir alitsü südi ta amanger saka mapa shidak inyaker asü masüar asadangtsü mapang agütsü, ta South Korea i shia lir.

Pyongyang-i Malligyong-1 satellite takok ngua orbit-i yokogo ta ashi aser ghonda ishika tsüngta Guam nung aliba United States military bases indang noksa repranger, ta Kim-i shia liasü.

Pakistan nung telemtetba ya party mesüra candidates temi magir saka army temi agir. Zardari-i tir ama kümsük tanabuba inyakner aser Cabinet nunga shilem tajung aginer, ta osang kar ajanga ashi.

Par jabaso aser PPP Chairman Bilawal Bhutto-Zardari indang jembidang, 'politics nung pa training junga magi aser pa tajangshiba peria mali, anungji mapang nüngdaktsü,' ta pai ashi.

Pakistan Tehreek-e-Insaf (PTI) ya menokdangtsü saka iba election nung shilem agütsü, saka iba telok lenir Imran Khan madentsü, ta pai ashi.

Zardari-i osangbener den jembiba ajanga pa indang mangdang tejangja sayur.

Pa tir inyaktsü aser PML-N ya Punjab aser danga tesemtem nung kisüng toktepa Sindh-i marutsü pai Sharif aser PML-N den jembitsü meranger, ta ashir.

Election asüngteta agütsü ni Election Commission of Pakistan nung tamang akar. PPP temba jenjang nung alitsü, ta Zardari sangdong ka nung ashi.

"Tensa ajak nung election nung tokteptsü PPP dak dang tashi lir," ta pai ashi.

## Kenya tzümetüsüng nung nisung tenetasü

Nairobi, Yimpoksü/Nov.

**24 (Agencies):** Kenya south-eastern tsütsü nisung tenet tzümetüsüng agi ponger aoba sülen parnok ya süogo ta amanger.

Yangji alir lenir kati ashiba agi, parnok ayong ajanga aotsü meranga ayong tiyong nung süngtem ka nung mena lia tzümetüsüng adoka pongzüker ao.

Parnok ya Nairobi nung First Lady Rachel Ruto ajurur Makueni County nung pei kidangi meyipa shilanger liasü.

Kenya aser kidanger Somalia aser Ethiopia linüktem nung tzümetüsüng agi timtemba mapang lir.

Ghonda ishika tzünglu kanga sashia aruba sülen Muooni River nung tzümetüsüng adokba ajanga nisung aika taolen makai anendaka liasü saka parnoki Brehostibar nikongdang ayong ya ajangtsü pangjem, ta ashi.

"Parnoki ayong ajangtsü merangba mapang tzü tali kuma parnok ayong tiyong nung süngtem nung mena liasü," ta yagji aliba lenir Norman Musyoki-i Daily Nation osangkaket dang ashi.

"Ajungbena ayong nung tzü timba kuma parnok pongzüker ao aser ayong tezülen nungi teyari magütsüti dangar temi repranga liasü."

Ketdangsürtem iba telok nung nisung kwi aliar tejangja metettsü merangr, saka tenük tzünglu tali arudaktsü.

**GOVERNMENT OF INDIA**  
**MINISTRY OF DEVELOPMENT OF NORTH EASTERN REGION**  
**NORTH EASTERN COUNCIL SECRETARIAT,**  
**NONGRIM HILLS, SHILLONG-793003**  
Website: <https://necouncil.gov.in>

### PUBLIC NOTICE

Tarutsü nung NEC Merit Scholarship ajak Aadhar seeded Account nung dang inoktsütsü. NEC Merit Scholarship asoshi apply asüba kaketshir temi senotsü tetsükdak makai agitetsü asoshi pei account Aadhar den sendakteptsüla. Academic Year 2023-24 atema application tem scholarships.gov.in nung agütsüttettsü.

Sd/-  
(Sherry Lalhangzo)  
Economic Adviser (E&M)  
& 1/c Director (HRD&E)

CBC 11104/12/0010/2324

**CENTRAL COUNCIL FOR RESEARCH IN AYURVEDIC SCIENCES**  
(Ministry of Ayush, Government of India)  
J.L.N.B.C.A.H. Anusandhan Bhawan,  
No. 61-65, Institutional Area, Opp. 'D' Block, Janakpuri,  
New Delhi-110058

Advertisement 2023 (December Batch)

CCRAS Post Doctoral Fellowship Scheme  
(CCRAS PDF Scheme)

Sempt aliba lanurtem jangjateta Ayurveda nung multidisciplinary areas balala nung training aser research agütsü maongka agütsü atema Ministry of Ayush nungi temelaba agir Ministry of Ayush, Government of India indang autonomous body, Central Council for Research in Ayurvedic Sciences (CCRAS) ajanga tawa "CCRAS Post Doctoral Fellowship Scheme" tenzüka lir. Iba scheme nükjidong ya parnok independent research career kuma anitetsü asoshi lir. CSIR, ICMR, DBT, National Institutes, recognized Universities and National Institutions of Ayush amala nungi Ayurveda nung Ph.D/PG degree bena alirtem aser sendaktepa aliba science disciplines nung Ph.D. bena alirtem nem CCRAS ajanga küm shia iba amala fellowships ter (10) agütsütsü teblembe lir. Item fellowships ya Director General, CCRAS ajanga Institute/Centre nüngdakba nung ajemdaker lemzüksütsü. June 2023 batch nung 7 PDF agütsügo. Iba advertisement ya December, 2023 batch asoshi tanüngba 3 PDF asoshi lir. Application agütsütsü asoshi tatem anogoji December 31, 2023 alitsü.

Temsüa aliba tejangrar temi Council indang website www.ccras.nic.in nung CCRAS PDF Scheme, application form, undertaking aser eligibility, age limit, tenure, remuneration, how to apply aser mode of selection amala tejangja angutsü.

Administrative Officer (Estt.)

CBC 17216/12/0029/2324

## NIAPA nung mezüngbuba table tennis stadium semzükogo



North East India Academy of Performing Arts (NIAPA), Agri Expo, Dimapur nung November 24, 2023 nü asem buba North East Open Table Tennis tournament asayadang tangokba noksa ka angur.

**Dimapur, Yimpoksüi/Nov. 24 (TYO):** Hokulbarnü 'First Exclusive Table Tennis Stadium' Nagaland Deputy Chief Minister TR Zeliang-i, asenoki lungjemer mera agia sapang agütsüra linük nung North East region ya saisapong tsütsü 'powerhouse' akumtsü, ta ashi.

Alimai metettsü asoshi region nung sempet agi anünga meranga inyaktsü ajungshia mali aser saisapong mashi nung tajungtiba jenjang angutsü lanur dak sempet lir, ta Zeliang-i bendanga agütsür training North East India Academy of Performing Arts (NIAPA), ajanga dang item jenjang Agri Expo, Dimapur nung tongtetsü, ta pai ashi.

First Exclusive Table Tennis Stadium yanglúa asem buba North East Open tournament ayongzükba asoshi pai NIAPA nem tenüngsang agüja liasü.

State nung lanur asayartem iba sapang yagi tajangzük tulu angutsü imlar, ta pai ashi.

Asem buba North East Open Table Tennis tournament nungya national players densema North Eastern states nungi asayar 70 shi arua team event aser open category nung shilem agir, koba asemnū alitsü.

## Phek nung Inter Departmental Tournament tenzükogo



**Dimapur, Yimpoksüi/Nov. 24 (TYO):** Phek nung Inter Departmental Tournament 2023 tenzükba sentong Badminton Stadium, Phek nung November 23, 2023 nü agia liasü, kong SP Phek, Dr. Pritpal Kaur Batra, IAS tesemdanger tongti liasü.

Lai iba asayamung tenzükja jembidang 2 Timoti 2:5 azüng aser ozüng nung aliba ama toktepa masaya tashi athlete kata asayar tajung masü, ta ashi.

Saisapong ajanga asenok

dang yimya tajung, team work, bendanga agütsüba aser saisapong tanüla sayur. Saisapong ajanga asen temang aser mental health anema yutsür, tashidak balala nungi kumzüker, anungji ajaki pei jangraba aser pei tashi nung teti asayatsüla, ta lai ashi.

Iba sülen lai ananü (November 23-24) Inter Departmental Tournament tenzükja liasü, aser iba sülen SP Phek, CO 5th NAP, DC Phek aser dangartem tsüngta exhibition match asaya.

Wutsutho Nyuthe, DSO Phek ajanga asayartem tenangzükter agia liasü aser Tsenthungs E. Ngullie, NCS, SDO (C) & Convener, Inter Departmental Tournament ajanga tarur pela agizükba o jembi.

Thungchibemo, Pastor, Lotha Baptist Church Phek ajanga sentong tenzükja sarasadem aser Nekhoyi Stephen Rhakho ajanga temeja ken ka tena liasü. Iba sentong nung menden Er. Kesowewetsah, AUDO, Phek liasü.

## Tanü Rajasthan nung assembly...

(Tapak 3 nungi...)

BJP nungi tongtibang candidate tem rongnung opposition lenir Rajendra Rathore, taoba mapang Rajasthan BJP Tir, Satish Poonia, taoba mapang chief minister Vasundhara Raje aser MP tem- Diya Kumari, Rajyavardhan Rathore, Baba Balaknath aser Kirodi Lal Meena nunger lir.

Tang Rajasthan nung

Congress MLA ajak senteper 107 lir, BJP MLA 70, RLP MLA 3, CPI (M) aser Bhartiya Tribal Party (BTP) na nungi anana, Rashtriya Lok Dal nungi ka aser Independent MLA 13 lir; Udaipur aser Karanpur menden nabo tazüng lir.

Chief Electoral Officer Praveen Gupta-i, state nung polling station ajak senteper

## Vijay Hazare Trophy: Bengal-i Nagaland akok

**Dimapur, Yimpoksüi/Nov. 24 (TYO):** Vijay Hazare Trophy 2023-24 nung Nagaland Senior Men's Cricket team mezüng asaya nung A.R. Easwaran aser Sudip Kumar Gharami nati runs 57 aser 62 yanglúa Bengal-i Nagaland madak wicket 9 agi koka liasü.

Toss akokba sülen Bengal captain Sudip Kumar Gharami-i mezüng bowling asütsü shima liasü aser Joshua Ben Longkumer aser Sedezhalie Rupreto nati junga asaya tenzükka Nagaland team-i runs 139 dang yanglutet. Bengal bowler temi kanga

## Kohima Open Volleyball Tournament 2023 ayonger

**Kohima, Yimpoksüi/Nov. 24 (TYO):** 10 buba Kohima Open Volleyball Tournament 2023 (Men & Women) asayamung ya November 27-30, 2023 anogotem Indira Gandhi Stadium, Kohima nung "Transcending Through Sports" omen kubok ayongzütsü.

Iba asayamung ya Department of Youth Resources & Sports, Nagaland ajanga Kohima District Volleyball Association (KDVA) den lungjemer ayongzüker. KDVA ajanga sangdong ka

## LA 2028 Olympics nung cricket dena asayatsü

**Yimpoksüi/Nov. 24, 2023 (Agencies) :** International Olympic Committee-i temelaba agütsüba sülen Cricket aser flag football densema 2028 Los Angeles Games nung asaya tasen pongu asayatsü.

LA Games ayongzükertemi Lacrosse, squash aser baseball-softball bendenloktsü asoshi benokdang Mumbai nung IOC senden amenba mapang agizükogo.

IOC temzung ozüng kubok asayamung ayongzüka asayaba yimtitemi asayamung nung asaya kar benoka asayatsü atema temepeshiba agütsüteter.

IOC Executive Board-i taoba mapang asaya pongu agizüktsü atema renemer liasü aser item asayatsü asayatsü asoshi temelaba agütsülo. IOC züngsem 90 shi nungi züngsem anatidang item asayatem bendenloktsüba anema vote süa liasü.

Cricket, koba India nung kanga sapua asayar aser alima ajunga nung terprangertem kanga kara renloka odar, iba asaya ya aso ka sülen maneni Olympics nung bendenlokogo. Cricket ya 1900 Olympics nung khen asaya liasü.

LA Games-i, tetsür aser tebur naprongla atema team trok asayatsüba Twenty20 cricket tournament ka asoshi benokdanga liasü.

Asaya ponguprongla ya edition ka atema dang lir saka maneni asayayonga aotsü timla lir. Flag football ya American football indang non-contact

**BILEMDANGANG**  
"Süngjang achitsü asoshi süngtongi atutsüla."